

Pesta Tamu Gadang UMS bakal menggegarkan lagi

UB 14.11.2014 A3

KOTA KINABALU: Universiti Malaysia Sabah (UMS) sekali lagi bakal menjadi tumpuan apabila Pesta Tamu Gadang

kembali bertempat di Padang Kawad kampus EkoPelancongan itu pada 18 hingga 24 November 2014.

Program yang diadakan sempena Majlis Konvokesyen UMS ke-16 itu menjangkakan kemeriahan berganda berbanding tahun lalu berdasarkan penambahan gerai-gerai jualan, pameran dan gerai permainan yang dibuka pada tahun ini.

Penyelaras Tamu Gadang Alan James berkata, program yang sering dinanti-nantikan masyarakat sekitar Kota Kinabalu itu turut mempelawa orang ramai menyertai dalam beberapa pertandingan yang bakal menyemarakkan lagi acara pada kali ini.

“Antara pertandingan yang dianjurkan ialah Cabaran Orang Kuat, Sukan Konvo, Pameran Kereta Berhias, Pertandingan Sistem Audio Kereta, Pertandingan Karaoke dan banyak lagi,” katanya ketika dihubungi media.

Turut menjadi pengisian menarik katanya, ialah Pertandingan Lagu-Lagu Tempatan pada 21 November.

“Selain memeriahkan Tamu Gadang pada kali ini, pertandingan yang buat julung kalinya diperkenalkan itu juga adalah satu usaha universiti untuk sama-sama menyemarakkan industri muzik tempatan negeri Sabah,” kata Pegawai Kebudayaan di Jabatan Hal Ehwal Pelajar UMS itu.

Berlangsung selama lima hari, Pesta Tamu Gadang akan dimeriahkan lagi dengan penampilan artis terkenal tanah air seperti Azlan The Typewriter, Alif Satar, Farhan, Nash serta Elizabeth Tan.